

Լ ՈՒՐ ԵՐ

Պարիզից վերադարձաւ Թիֆլիս մեր վաղեմի աշխատակից պ. Շիրվանզադէն և այսուհետև նորից կաշխատակցէ և, մեր թերթին, Առաջիկայ համարից «Լումայ»-ում կսկսենք տպել նրա «Աւերակների վրայ» դրաման, որ դեռ հրատարակուած չէ ոչ մի տեղ:

Էջմիածնում կատարուեց եպիսկոպոսական ձեռնադրութիւն. ձեռնադրուեցաւ Գաղատիայի առաջնորդ Բարգէն, Պանտորմայի առաջնորդ Կարապետ, Կարինի առաջնորդ Սմբատ, Եգիպտոսի առաջնորդ Մկրտիչ, Կտուց անապատի վանահայր Ստեփան, Երուսաղէմի պատր. փոխանորդ Դանիէլ վարդապետները, իսկ ռուսահայ վարդապետներից՝ Երևանի փոխանորդ Խորէն և Թիֆլիզի կոնսիստորի անդամ Եփրեմ վարդապետները:

Բարգէն սրբազանը Արմաշու սան և ապա նոյն Դպրեվանքի տեսուչ, աշխատակցում էր «Լումայ»-ին, յայտնի է իւր գրաւոր վաստակներով, որոնցից առանձին գրքով բացի ուրիշներից տըպուած է նրա մի ընդարձակ գործը՝ Նղիշի ուսումնասիրութիւնը:

Թիֆլիսում կայացաւ «Թեմական խորհրդի» ժողովը, ուր ընտրուեցան Ներսիսեան դպրոցի համար լրացուցիչ հոգաբարձական ընտրութիւններ:

Ն. Նախիջևանում կատարուել է Գր. Չալխուշեանի փաստաբանական գործունէութեան քսանևհինգամեակը:

ԽԱՌՆ ԼՈՒՐ ԵՐ

ԹՈՒՔԱՆՏԻ ՆՈՐ ԴԵՂ

Շվեդական բժիշկ, դօքտօր Պֆաունէնշտիլը փորձեր է կատարում իր գտած նոր դեղով կոկորդի և թոքերի հիւանդութեան դէմ: Առաջին փորձերը խիստ յաջող են անցել և շվեդական բժիշկները յոյս ունեն, որ նրանց պաշտօնակցի յայտնագործութիւնը մարդկութեան ձեռքին մի հզօր միջոց կտայ պատերազմելու թոքախտի՝

եքկրիս ժամանակակից բնակիչների այդ ամենաչարթըշ-
նամու դէմ:

Դօքտօր Պֆաուենէնշտիլի դեղը էրլիխի դեղինման մի
քիմիական միաւորութիւն է, որ սակայն գործ է դրուում
հիւանդի վրայ ոչ թէ ներարկումով, այլ ներսից ընդու-
նելով և ներշնչումով միաժամանակ: Պֆաուենէնշտիլը հի-
ւանդին տալիս է երկու համեմատաբար չեղոք դեղեր,
որոնք միաւորուելով նրա արիւնի մէջ՝ առաջ են բերում
մի տեսակ քիմիական միաւորութիւն, որ ուժեղ կերպով
սպանում է թոքախտի բացիւնները:

Դօքտօր Պֆաուենէնշտիլը հիւանդներին տալիս է ման-
շային նատրի (iodist. natrium) լուծուածք կամ փոշի, իսկ
այնուհետեւ, փոքր ժամանակ անցնելու յետոյ, ներշնչել
է տալիս օզօնացած օդ կամ թթուածին: Օզօնի ներգոր-
ծութիւնից մանշային նատրի վրայ հիւանդի յօրինուածքի
մէջ գոյանում է ազատ մանիշ, որ ընկնելով թոքերի
կամ կոկորդի հիւսուածքներից մէջ, կատարելապէս ոչն-
չացնում է բացիւնները:

Շվեդական բժիշկների փորձերն ապացուցել են, որ
այս եղանակով առանձնապէս յաջող է բժշկուում կոկորդի
թոքախտը, ուր աւելի հեշտ է ներս թափանցում շնչած
օզօնը:

Թոքերի թոքախտը, եթէ միայն թոքերի կատարներն
է հիւանդացել, բժշկուում է, բայց ինչքան որ հիւանդու-
թիւնը տարածւում է ներքեւ, այնքան Պֆաուենէնշտիլի
դեղը թուլանում է, որովհետեւ օզօնը միշտ չի կարողա-
նում թափանցել թոքերի խորքերը:

